

Dua acara baru dlm pesta silat Persisi

PENCAK SILAT

ORANG ramai akan berpeluang menyaksikan dua acara baru dalam pesta silat anjuran Persekutuan Silat Singapura (Persisi) tahun ini.

Satu darinya ialah tarian seni silat perseorangan yang menonjolkan kesenian permainan silat, langkah dan jurusan dengan setiap pertunjukan diiringi oleh gamelan.

Satu lagi acara baru ialah pertandingan silat masal atau persembahan silat secara kumpulan.

12 SEP 1984

Dalam acara ini, setiap kumpulan akan diadili dari segi taraf fizikal, seni senaman dan jurusan. Rentak paluan gong akan mengiringi para peserta bahagian ini.

Silat olahraga

Tema pesta kali ini diubah dari pertandingan olahraga kepada kesenian silat. Ini bermakna Persisi tidak akan mengadakan pertandingan silat di peringkat saringan dan separuh akhir.

Pesta Silat yang ke-8 ini akan diadakan di Dewan Badminton Singapura pada 15 dan 16 September, mulai 8.30 hingga 11.00 malam.

Persisi telah menganjurkan pesta itu sejak 1976 tetapi dalam 1982 ia diwujudkan dan digantikan dengan silat olahraga antara balai-balai rakyat.

Seramai 113 orang peserta dari 10 perguruan silat telah mendaftarkan diri untuk mengambil bahagian, termasuk 12 orang peserta wanita.

Enam acara akan dipertandingkan dalam bahagian lelaki iaitu tarian silat perseorangan, silat masal (kumpulan), tunas pendekar, pendekar muda, pertandingan silat terbuka dan bahagian pendekar.

Sementara untuk bahagian wanita pula, para peserta akan bertanding dalam bahagian srikandi, srikandi muda, silat perseorangan dan tunas pendekar.

Para pemenang akan menerima hadiah berupa piala dan pingat. Pemenang acara keseluruhan akan menerima piala pusingan Haji Ya'akob Mohamed.

Setiausaha Agung Persisi, Encik Johari Uriff, memberitahu *Berita Harian* bahawa para pemenang mungkin berpeluang mewakili Singapura ke pesta silat antarabangsa, yang akan diadakan di

Kuala Lumpur dari 20 hingga 24 September ini.

Seluruh pertandingan itu akan diadili oleh satu jemaah pengadil yang terdiri dari enam orang wakil — tiga dari Singapura dan tiga lagi dari Johor, Melaka dan Selangor.

Dalam pesta kali ini para penonton juga berpeluang menyaksikan sekurang-kurangnya dua silat kebatinan, sebagai acara selingan.

Menurut Encik Johari, Persisi membelanjakan lebih \$7,000 untuk menjayakan pesta itu.

Pencak Sunda

Tiket-tiket berharga \$2 boleh didapati dari pejabat Persisi di Blok 10, Eunus Crescent, #07-2731 atau cawangannya di Blok 723, Clementi West 2, #12-180.

Tiket-tiket juga boleh didapati dari kerabat Persisi termasuk Persatuan Bawean, Al-Haq, Pasak dan Perwanit.

Beberapa perguruan silat juga ada menjual tiket pertandingan itu seperti Silat Gayung, Pukulan, Setia Bakti, Macan Pasrah, Si Pitung, Silat Cekak, Panca Sakti dan Pencak Sunda.